

आकाशवाणी जयपुर-अजमेर
प्रादेशिक समाचार
दिनांक : 13.01.2026 समय : 18.45 बजे

- सेना प्रमुख जनरल उपेंद्र द्विवेदी ऑपरेशन सिंदूर ने तीन्यू सेनावां रा तालमेल री सब ऊँ बत्ती मिसाल बताया- कहा पाकिस्तान री किणी भी हरकत रो चावतो जवाब दियो जावेलां
- मुख्यमंत्री भजन लाल शर्मा महिलावां रे सागे बजट पैली री चर्चा करीं
- केंद्रीय लघु उद्योग राज्य मंत्री शोभा करंदलाजे कह्या-भारत ने विकसित राष्ट्र बणावा मांय एम.एस.एम.ई. हलका री महताऊ भूमिका व्हेलां
- प्रदेश मांय मकर संक्रांति मनाबा खातर बाजारां मांय रौनक-लोगां मांय पतंग उड़ाबा ने ले र भारी उच्छाव

000

सेना प्रमुख जनरल उपेंद्र द्विवेदी कह्या के ऑपरेशन सिंदूर तीन्यू सेनावां रा तालमेल री एक चोखी मिसाल हों इण मांय कार्रवाई करबा अर जवाब देबा री पूरी छूट हीं वे कह्या के ओ ऑपरेशन हाल भी चाल रह्यो है दुश्मन री किणी भी नापाक हरकत रो मुंह तोड़ जवाब दियो जावेलां नई दिल्ली मांय आज खबरनवीसां रा सम्मेलन ने संबोधित करता थकां सेना प्रमुख जनरल उपेंद्र द्विवेदी कह्या के पहलगाम आतंकी हमला रे पाछे निर्णायक कार्रवाई करबा रो फैसलो लियो गयो हों सेना प्रमुख कह्या के सशस्त्र बल नौ माय सूं सात लक्ष्य पूरी तरकाऊँ खत्म कर दिया हा अर पाकिस्तान री कार्रवाई रो नप्यो तुल्यो जवाब पक्को करबा मांय महताऊ भूमिका निभाई

000

मुख्यमंत्री भजनलाल शर्मा कह्या के महिलावां री सक्रिय भागीदारी रे बिना विकसित राजस्थान रो संकल्प पूरो नी व्हे सके हैं आज जयपुर मांय बजट पैली री बातचीत रे दौरान वणा कह्या के शिक्षित अर सशक्त महिलाएं ही समाज मांय सकारात्मक बदलाव लावे है, इण खातर राज्य सरकार महिला सशक्तिकरण ने आप री नीतियां रो केंद्र बणायो हैं मुख्यमंत्री बताया के 'लाडो प्रोत्साहन योजना' अर 'लखपति दीदी' भांत री योजनावां सूं महिलावां ने माली मजबूती मिली हैं वणा कह्या के महिलावां कानी ऊँ दिया गया स्वरोजगार, सुरक्षा अर शिक्षा सूं जुड़्या सुझावां ने आवता बजट मांय बजट मांय प्राथमिकता दी जावेलां इण मौके उपमुख्यमंत्री दिया कुमारी अर महिला प्रतिनिधि मौजूद री

000

प्रदेश रा जल संसाधन मंत्री सुरेश सिंह रावत कह्या के राज्य सरकार री कोशिश आवता बजट ने सगळा खातर बणावा री हैं जिण सूं समाज रा आखिरी छोर माथे खड़्या व्यक्ति रो हित सुरक्षित रहवें आज डीग मांय बजट पैली रा संवाद रे दौरान बणा महकमां रा कामां री समीक्षा करी अर जल जीवन मिशन रे तैत पाइपलाइन अर सड़क मरम्मत रो काम गुणवत्ता ऊँ पूरो करबा रा निर्देश दियां श्री रावत साफ कह्या के आमजन अर न्यारा-न्यारा वर्गो सूं बजट खातर मिल्या सुझावां ने राज्य सरकार ताई पूगायो जावेलां

कार्मिक, लोक शिकायत अर पेंशन राज्य मंत्री डॉ. जितेंद्र सिंह कह्या के विकसित भारत जी-राम-जी कानून माळी बरस मांय हर एक गांवांई पिरवार ने पहला सौ दिन एक ठौड़ां माथे 125 दिन री तनखाह वाळा रूजगार री गारंटी देवे हैं नई दिल्ली मांय आज विकसित भारत जी-राम-जी माथे खबरनवीसां रा सम्मेलन ने सम्बोधित करता थकां श्री सिंह कह्या क या योजना बुवाई अर कटाई रा मौसम रे दौरान खेती हर मजदूरां री मौजूदगी पक्की करबा खातर कुल 60 दिनां बिना काम री टेम भी देवे हैं वठिने केन्द्रीय पर्यावरण मंत्री भूपेन्द्र यादव आज खैरथल मांय एक जनसभा ने सम्बोधित करता थकां कह्या के वर्तमान केन्द्र सरकार कानी ऊँ लायी गयी वी.बी जी-राम-जी योजना गांव रा विकास रो आधार बणेलां

आज चित्तौडगढ़ मांय सांसद सी.पी. जोशी मीडिया सूं बातचीत करता थकां कह्या के वीबी जी-राम-जी योजना मांय मॉनिटरिंग .ऑफ जीओ टेकिंग सिस्टम सूं करी जावेलां जो भ्रष्टाचार रोकबा मांय कारगर सिद्ध व्हेलां

000

केंद्रीय सूक्ष्म, लघु अर मध्यम उद्यम राज्य मंत्री शोभा करंदलाजे कह्या के बरस 2047 तांई भारत ने विकसित राष्ट्र बणावा मांय एम.एस.एम.ई. हलका री भूमिका घणी महताऊ व्हेलां आज जयपुर रा उद्योग भवन मांय 'प्रधानमंत्री विश्वकर्मा योजना' री समीक्षा करता थकां वणा कह्या के खेती रे पाछे ओ हलको देश मांय रूजगार मुहैया कराबो रो सब ऊँ बड़ो जरियो हैं श्रीमती करंदलाजे अहलकारां ने केंद्र सरकार री योजनावां असरदार तरीका ऊँ लागू करबा रा निर्देश दियां मीडिया सूं बातचीत मांय बणा कह्या के केंद्र अर राज्य सरकारां मिल र छोटे उद्योगां ने बढ़ावो दे री है, जिण सूं बत्ता ऊँ बत्ता मोटयारां ने रूजगार मिल सकें

केंद्रीय राज्य मंत्री काल जयपुर मांय नुवा श्रम कानूनां री भी समीक्षा करेलां

000

राज्यपाल हरिभाऊ बागड़े कह्या के शिक्षा जीवन मांय बदलाव ल्याबा रो सब ऊँ बड़ो जरियो है, पढ़नियां ने किताबी ज्ञान रे सागे आप रा चरित्र रो भी विकास करणो चाहिजे आज डीडवाना मांय श्री बांगड़ महिला महाविद्यालय रा सालाना जळसा ने सम्बोधित करता थकां वणा टाबरियां सूं तकनीकी शिक्षा मांय आगे बढ़वा री अरज करीं पछे खबरनवीसां सूं बातचीत मांय वणा कह्या के हर व्यक्ति री माली तरक्की सूं ही देश रो विकास व्हे सके हैं

जळसा मांय पैली री मुख्यमंत्री वसुंधरा राजे शिरकत करीं वे कह्या के महिलावां हर हल्का मांय देश रो मान बढ़ा री हैं इण मौके राज्यपाल छात्रावां ने उपाधियां दीनीं इण सूं पैली श्री बागड़े पण्डित बच्छराज व्यास री मूर्ति माथे फूल चढ़ा र वां ने याद कर्यां

000

मुख्यमंत्री भजनलाल शर्मा आज आप रा रहवास माथे डूंगरपुर रा मोटयारां ऊँ मुलाकात करीं वणा कह्या के देश रा विकास मांय मोटयारां री भूमिका जरूरी हैं मुख्यमंत्री बताया के सरकार आदिवासियां अर युवावां खातर काम कर री हैं वणा जाणकारी दी के लारला दो बरसा मांय एक लाख युवावां ने सरकारी नौकरी दी गई अर दूजा पदां माथे भी भर्ती चाल री हैं वे कह्या अबै राज्य मांय परीक्षावां बिना पेपरलीक रे व्हे री हैं मुख्यमंत्री मोटयारां ने कौशल सीखबा, तकनीक अपणावा अर नश सूं दूर रहबा री सलाह दीं वणा बताया के बेणेश्वर धाम मांय सुविधावां रो विस्तार कर्यो जावेला अर निवेश सम्मेलनां रे मार्फत हलका मांय रूजगार रा नुवा मौका बणाया जावेलां

000

सामाजिक न्याय अर अधिकारिता मंत्री अविनाश गहलोत सामाजिक सुरक्षा पेंशन रा लाभार्थियां सूं वां रो सालाना सत्यापन बेगी ई कराबा री अरज करीं वणा कह्या के किणी भी पात्र व्यक्ति री पेंशन बंद नी करी गयी है, केवल सत्यापन नी होबा री बजह सूं रोकी गयी हैं सत्यापन प्रक्रिया पूरी होता ही रकम रो भुगतान फेरू सरू व्हे जावेलां

श्री गहलोत बताया क पेंशनर्स घर बैट्या मोबाइल एप रे मार्फत आप रो चेहरो दिखा र सत्यापन कर सके हैं इण रे अलावा ई-मित्र केंद्रां माथे अंगूठा रो निशान यानि बायोमेट्रिक्स रे जरिये आ प्रक्रिया पूरी करी जा सके हैं वे कह्या के सरकार रो लगस सगळा पात्र लाभार्थियां ने बिना रूकावट नियमित पेंशन मुहैया करणो हैं

000

भरतपुर समेत प्रदेश रा केई हिस्सां मांय लोग आग री परकम्मा कर उण मांय तिल, गुड़ अर अनाज डाल्यां इण मौके सामूहिक भोज अर लोहडी रा पारंपरिक गीतां रे सागे खुशियां बाटी जा री हैं मकर संक्रांति री पैली री सिंज्यां माथे आज प्रदेश भर रा बाजारां मांय भारी रौनक छाई व्ही हैं मारवाड सूं ले र वागड़ तांई उत्सव अर परंपरा रो अणूठो संगम देखबा ने मिल रह्यो हैं डूंगरपुर रा सागवाड़ा मांय 50 बरसा सूं चली आ री अणूठी परंपरां रे तैत न्यारा-न्यारा समाज मिल र गौ-माता खातर खास

'गौ-ग्रास' तैयार कर्यों इण खातर शुद्ध घी, गुड़ अर आटा सूं रोटियां बणाई गईं, ज्याने काल संक्रांति रे मौके सिरधा भाव सूं गाया ने खिलायो जावेलां पाली रा बाजारां मांय तिल-गुड़ रा लड्डू अर गजक री दुकानां माथे खरीदारा री भारी भीड़ हैं वठिने कोटपूतली-बहरोड़ मांय मोटयार पर्यावरण ने बचावा खातर मुश्तैद दीख रिया हैं अठे लोग प्लास्टिक री ठौड़ कागद री पतंगां ने बत्तो खरीद रह्या हैं

.....

राजस्थान पुलिस अकादमी मांय आज राष्ट्रीय सुरक्षा गार्ड-छैळ अर राजस्थान पुलिस भेळा मांय प्रशिक्षण कार्यक्रम री सरूआत करीं 'संपूर्ण सुरक्षा संवर्धन' नाम सूं राख्या इण कार्यक्रम री सरूआत पुलिस महानिदेशक राजीव कुमार शर्मा अर राष्ट्रीय सुरक्षा गार्ड रा महानिदेशक भृगु श्रीनिवासन कर्यां मीडिया सूं बातचीत मांय श्रीयुत् श्रीनिवासन बताया के इण रो लगस पुलिस बल री सुरक्षा अर खतमावां ने बत्तो मजबूत करणो हैं

.....

000

प्रदेश मांय आज भी उत्तरी जिलां समेत केई ठौड़ां माथे शीतलहर रो असर हैं वठिने चित्तौडगढ अर उदयपुर समेत दूजा जिलां मांय आज घणो कोहरा छायो रह्यो इण सूं केई इलाकां मांय दिखबा री क्षमता घट र 50 मीटर तांई रह गयीं आज सब ऊँ कम 2 डिग्री सेल्सियस कमती रा तापमान रे सागे करौली सब ऊँ ठण्डो रह्यो अलवर, दौसा, श्रीगंगानगर मांय तापमान 4 डिग्री सेल्सियस सूं नीचे दर्ज कर्यो गयो तेज सर्दी रे चालता जयपुर समेत 8 जिलां मांय 8वीं तांई रा पढ़नियां री आज भी छुट्टी रीं

000